

27 DEC 2000

Khair-Hutan

HUTAN SIMPANAN KEKAL AIR HITAM AKAN DIJADIKAN TAMAN HUTAN

SHAH ALAM, 27 Dis (Bernama) -- Hutan simpanan kekal seluas 400 hektar di Air Hitam, Puchong, akan dijadikan Taman Rekreasi Hutan dalam tempoh empat hingga lima tahun lagi, kata Menteri Besar Selangor Datuk Mohd Khir Toyo.

Katanya, ini adalah usaha kerajaan negeri untuk memelihara warisan hutan negeri itu dan pada masa yang sama memajukan sector pelancongan.

"Taman hutan ini yang dikelilingi oleh pusat bandar akan menjadi satu keunikan di Selangor," katanya kepada pemberita pada sidang akhbar ketika mengadakan rumah terbuka di kediaman rasminya, di sini, sempena Hari Raya Adilfitri hari ini.

Mohd Khir berkata Exco kerajaan negeri telah meluluskan kewujudan taman ini pada mesyuaratnya baru-baru ini.

Beliau berkata kerajaan negeri kini sedang mengenalpasti syarikat yang sesuai untuk menguruskan taman ini yang kosepnya sama seperti Taman Templar.

Diminta mengulas perutusan Hari Raya Perdana Menteri, Datuk Seri Dr. Mahathir Mohamad yang menyentuh tentang perlunya umat Islam terutamanya orang Melayu bermaaf-maafan di Hari Raya ini, Mohd Khir berkata seruan itu adalah tepat pada masanya dan harus dihayati oleh semua rakyat Malaysia termasuk orang Melayu demi menjaga keharmonian yang sedia wujud sejak kemerdekaan.

"Walapun terdapat pandangan dan pendapat yang berbeza dari segi politik di antara kita adalah wajar bagi kita menggunakan peluang Hari Raya ini supaya bermaaf-maafan dan mengukuhkan silaturahim demi keutuhan negara dan kemajuannya," katanya

Beliau berkata budaya kunjung-mengunjungi rumah terbuka sahabat-handai yang agama Islam pada masa perayaan ini jelas membuktikan perpaduan di antara kaum di Malaysia tetap kukuh dan kuat.

Katanya, pergaduhan dan pertelingkahan sesama kita hanya akan membawa kemunduran dan sebaliknya jalan yang baik adalah untuk duduk semeja dan membincang apa jua masalah yang timbul dan mencari jalan untuk mengatasinya.

Lebih 20,000 rakyat dari segenap lapisan masyarakat mengunjungi rumah terbuka Mohd Khir.

--BERNAMA

KM SR